

OHR traži transparentnost po pitanju imovine koju je platio svaki građanin BiH



Šansa da se ispuni uslov u vezi sa pitanjem državne imovine prije novembarskog sastanka Upravnog odbora Vijeća za implementaciju mira (PIC) ne smije biti propuštena.

Međutim, sada je jasno da Radna grupa za izradu popisa imovine koju je formiralo Vijeće ministara neće uspjeti okončati popis imovine do utvrđenog roka, 30. septembra 2009. godine.

Visoki predstavnik je zbog ove činjenice uputio pismo državnom te entitetskim premijerima u BiH, pozivajući da se odmah naprave pomaci u prikupljanju i klasifikaciji podataka o nepokretnoj imovini, u skladu sa onim što je utvrđeno odlukom Vijeća ministara 9. aprila 2009. godine.

Ovom odlukom, Radna grupa za izradu popisa zadužena je da prikupi dokumentaciju iz zemljišnoknjižnih i katastarskih ureda iz cijele BiH o imovini koja je do 31. decembra 1991. godine bila registrirana kao vlasništvo ili imovina za korištenje, na ime tijela SFRJ na teritoriji BiH ili na ime SRBiH.

Ove informacije su dostupne široj javnosti.

Upravni odbor Vijeća za implementaciju mira već je dao upute visokom predstavniku da poduzme sve adekvatne mjere kako bi osigurao ispunjenje pet ciljeva u potpunosti.

Uzimajući u obzir neupućene izjave koje su date jučer o ovom pitanju, OHR želi istaći slijedeće:

(1) Izrada popisa je tehnički proces prikupljanja informacija od zemljišnoknjižnih ureda, koje su već dostupne javnosti.

(2) Svaka osoba može tražiti i dobiti ove podatke. Ovo je javna imovina koja se čuva za dobrobit svih građana.

(3) Ono što će biti obuhvaćeno ovim popisom nije pitanje za OHR niti za međunarodnu zajednicu. To je utvrđeno odlukom Vijeća ministara od 9. aprila 2009. godine, kada je formirana Radna grupa za popis imovine.

(4) Odluke visokog predstavnika su donesene kako bi se zaustavilo opšte raspolaganje imovinom u javnom vlasništvu prije definiranja i uspostavljanja sistema. Ovo je odvojeno od mandata Radne grupe za izradu popisa koju je formiralo Vijeće ministara.

(5) Prikupljanjem ovih informacija OHR ni na koji način ne određuje ishod političkog dogovora koji mora biti postignut o raspodjeli ove imovine.

Svi koji se protive takvom transparentnom procesu prikupljanja informacija, kojim bi se utvrdilo šta se desilo sa ovom imovinom od 1991. godine, morali bi objasniti zašto ne žele da sami vlasnici, a to uključuje svakoga građanina BiH, dobiju ove informacije.